

## TIMOTEOMO PABLO NANO ORETAGA RABE

### *Pablo Timoteona uaiduacino*

<sup>1-2</sup> Timoteo, bie carta omo cueticue. ¿Nigacino? ¿Nie isoidio? Pablodicue. Cristo Jesús ore-tagamiedicue. Ie rafue lollena, naimie cuena orede Naimiena cue cioillena, naimie isoi cue illena, naimie abido billemo ocuridicue. Jusiñamui cuena jiai orede. Naimiedi cai Jilloitaraïma. Cue llofuiacïnomona Cristona o raise ñnua jira, cue jito isoi cue mamecao. Cai Moo Jusiñamui, cai Nama Jesucristo diga, ona jai duenaite. Iena uiñocana mai o jai. Ona jai uri itatatiaïmaiaï. Iena uiñocana mai o jai.

### *Cristo rafuena taïnona llofueraïni llofuiacïnodo jaiñeno*

<sup>3-4</sup> Macedoniammo jaie jaidicuemmo, Efesommo o fiebicaillena ommo lloticue. Nainommo dajerie Cristo rafuena raise llofueñedimaci; iadedi jiaïforie llofuetimaci. Diga ñgaiaïna faca-facadimaci. Imaci usumatiaï mamecido siadocabitimaci. Iemona conini uaina uaitaside. Jusiñamui jitailla isoi comini marena illana llofueñedimaci. Jusiñamuina cai ñnuamona, marena iticai. Iena llofueñedimaci. Ie jira naimaci uaina llïcaita.

<sup>5</sup> Jusiñamuina comini isiruillena, jiaïe cominina jiaï naimaci isiruillena, Jusiñamui uaina llofueticai. Naimaci comeciaï jeaninana jitaïdicai. Jusiñamuina raise naimaci ñnuana jiaï jitaïdicai. Ie jira Jusiñamui rafuena llofuecabiticai.

<sup>6</sup> Dajerie llofueraini iese llofueñedimaci; iadedi jamai ñaitimaci.

<sup>7</sup> Moisés micori jaie llogacinuaido llofueiacadimaci; iadedi iena llofuiana uiñoñedimaci. Naie llogacinuaina ua uiñoñedimaci.

<sup>8</sup> Iena raise llofuegana, Jusiñamuina uiñoñedinona naimiena uiñotallena, mare. Iena uiñoticaí.

<sup>9-10</sup> Moisés micori llogacinuaidi mareuidinomo jainaiáiñede. Jiaínomo jainaiáide: Jusiñamui uaina inoñedinomo lloga uaina inorainidinomo, Jusiñamuina jitaiñedinomo, jeacino finorainimo, jeare ñaicabitinomo, Jusiñamuina enoidinomo, eina meinetinomo, moona meinetinomo, jiaie cominina meinetinomo, aiñede riño diga itinomo, iniñede iima diga itiñaiñuaimo, daje isoide iima diga conini aifuedotinomo, comena fíidinomo, taino llorainimo, taino llwana jifueridinomo, uanai rafue facaisena iñedinomo. Nana Cristo rafue facaina iñedinomo Moisés micori llogacinuai ua jainaiáide;

<sup>11</sup> ia naie rafue cuemo jai jainaiáiñede. Ie mare rafuena cue llollena, Jusiñamui cuena jai orede. Maremiena Jusiñamui illamona, naimie rafue jiai eo ebirede.

*Jusiñamui caina duenaila jira, Pablodi iobide*

<sup>12</sup> Cuena fetua jira, cai Nama Cristo Jesúri iobidicue. Naimiena cue inollena, naimie cuena uiñuamona, cuena fetode, naimie rafue cue llollena. Iena llollena, cue comequina jiai ocuiñotade.

<sup>13</sup> Jaie naimiena jeare ñaiticue. Naimiena inotinona jiai duere finodicue. Abina cue uiñoñena jira, naie facaiseconi naimiena nia cue

ñnoñena jira cuena duenaillamona, naimie cuena fetode.

<sup>14</sup> Cuena eo duenaite. Iemona naimiena ñnoticue. Naimiena jiai isiruiticue.

<sup>15</sup> Bie lluadi mare cue uiñuamona, nana comini biena ñnuana jitaidicue. Maraiñedinona naimaci jeacinomona jilloitallena, eniruemo Jesucristo bite. Ero, nanoca jeacinona finoraïmadicue;

<sup>16</sup> iadedi Jesucristo cuena duenaite. Naimiena cue ñnuamo jaiie fecuise ocuride. Nana jeacinona finoraïmo fecuise ocuride, naimiena ñnollena. Naimiena cai ñnuamona, Jusiñamui diga jaca iiticaï. Cuena duenailla jira, biruimona naimiena ñnoitïnodi naimie naimacina duenaillana uiñoitimaci.

<sup>17</sup> Jusiñamuidi nanocamie. Jaca fioldaiñeite. Naimiena cionidicaï. Naimie damiede. Jaiïena iñede. Naimiena jaca iobicabillasa. Iena jitaidicue.

<sup>18</sup> Ero, Timoteo, cue jito, omo rafue lloiacadicue. Nano o llofueraïmana jaiacana facaise ailluena Cristo rafuena llofueraïnidi ona jaiie llotimaci: “Naimie raise marena llofueite” llotimaci. Iena comecianona, o comeci ocuiñocana o jai, Cristo rafuena riidocana o jaillena.

<sup>19</sup> Cristona ñnocana o jai. O comecina marena finocana o jai. Dajerie naimaci comeciaï iuaimo comeciaïna facañedimaci. Ie jira Cristona jai ñnoñedimaci.

<sup>20</sup> Iese ite Himeneo. Alejandro jiai jai daje isoide. Jai ñnoñediaïmaiaï. Ie mei iaïmaiaïna Taife anamo jai itabicaïtaticue, duere sefuillena. Iaïmaiaï fueollena, Jusiñamuina jeare ñaiñellena, iese itabicaïtaticue.

## 2

### *Nana comini facaina jaitica*

<sup>1</sup> Diga rafue omo lloiticue; iadedi daje rafue motomo ite. Nanoca rafue. Iena omo lloiticue. Jusiñamui diga omoi ñaia, nana comini facaina jii. Naimaciri iobillacinona Jusiñamuimo feca.

<sup>2</sup> Uri cai illena, Jusiñamuina raise cai sedallena, Jusiñamui jitailla rafuena cai finollena, illaicomini facaina cai jii.

<sup>3</sup> Iese cai jia, Jusiñamuimona mare. Naimiedi cai Jilloitaraima.

<sup>4</sup> Naimiedi nana comini naimaci jeacinomona jilluana jitaide. Uanaicinona naimaci uiñuana jiai jitaide.

<sup>5</sup> Nana nairai ai imaci Jusiñamuidi jaca dajede. Comini diga Jusiñamui facaisena ñairaima jaca dajede. Naimiedi Cristo Jesús. Comini Jusiñamui facaisena naimie ñaicabite. Comini facaisena ñairaima jaca dajede. Naimiedi Cristo Jesús. Naimie iimananona, comini facaisena ñairede. Ie muidona comini diga Jusiñamui jai nabairede. Jusiñamui diga comini jiai jai nabairedimaci.

<sup>6</sup> Cai jeacinomona cai eneno illena, Jesucristo nana cai facaina jai fiodaite. Naimie jitailla fa-caiseconi Jusiñamuidi cominina bie rafuena jai uiñotade.

<sup>7</sup> Bie rafue cue llollena, Jusiñamui cuena fetode. Judíuaiñedinomo cue llollena, bie rafue naimaci ñnollena, uanaicinona naimaci uiñollena, cuena orede. Tainona lloñedicue.

<sup>8</sup> Ie jira naga roracomo ite iñia, cai comini onolliai a ñuitacabilla isoi, comeciaino jeacino iñenanomona, Jusiñamuimo jiana jitaidicue.

Naimaci comeciáimo icirillacino iñedemo, Jusiñamuimo jii. Naimaci comeciáimo uaitajacino iñedemo, Jusiñamuimo jii.

<sup>9-10</sup> Riñoniaimo jiaí lloiticue. Roracomo omoí jaia, abí ieduamo comeciáina facañenamona, omoí ifotiena fino. Jamai ebinai raillano, abí ieduamona abina finora jitañeno. Jamai ebinai raillano, abí ieduamona eo raifide iniroina jitañeno; iadedí mare rafuena omoí finuamona, ebinaitomoí. “Jusiñamuina ñnoticái” omoí raillanona, naimie jitailla isoi, marena omoí finolle.

<sup>11</sup> Rollena comini ofia, ñaiñenanomona, uaitañenamona omoí fueo.

<sup>12</sup> Omoí ofia, omoí iñiáina llofuiana jitaiñedicue. Nainomo omoí ñaiñena. Iñiái omoí anamo illana jitaiñedicue. Iese omoí riñoniaimo lloiacadicue.

<sup>13</sup> Jusiñamui Adán micorina nano finua jira, iese lloticue. Adán micorí finua mei, Eva micorina jiaí finode.

<sup>14</sup> Taifedi Adán micorina jifueñede; iadedí Eva micorina jifue. Ie mei naie riño jeacinona finode.

<sup>15</sup> Iemona jilloite; iadedí uruiái jococana jaite. Riñoniaidí Jusiñamuina ñnoia, jiaie cominina isirua, Jusiñamui jitailla rafuena finoia, ie abina eenoia, jilloitimaci.

### 3

#### *Creyentiaína sedaraíni illa rafue*

<sup>1</sup> Bicinodí uanaicino. Creyentiaína llofueraimana bu jaiacania, naimie comecimo mare jitaillacino ite.

<sup>2</sup> Bie isoide llofueraimana jaiacadimiena jitaidicue. Naga comini naimie mare raillamie. Dañaiñona airedimie. Abi eenotimie. Ebona iñedimie. Inogamie. Jiaie comini naimie jofomoriadedi, raise nafuecabitimie. Jusiñamui uaina raise llofuecabitimie.

<sup>3</sup> Jifairuiñedimie. Fuirirainidimie. Raire icirirainidimie. Ucubena nicidoñedimie.

<sup>4</sup> Naimie cominina raise sedadimie. Naimie anamo naimaci illanona, naimie uruiaie uaina raise inotadimie. Ie isoidimie llofueraimana jailana jitaidicue.

<sup>5</sup> Iese naimie iñenia, ie anamo itinona naimie raise sedañenia, ¿niese jiaie creyentiana raise sedaite?

<sup>6</sup> Como creyentena jaidimiena creyentiana llofueraimana fetoneño, naie diga naimie abi iedoi raillano. Abi ieduamona, Taife isoi jeacino finoite.

<sup>7</sup> Llofueraimana jaiacadimiena creyenteñedino: “Mare” raiñenia, naimiena fetoneño. Iese naimiena raiñenia, naimie joreñona jeare ñaitimaci. Iemei Taife ramo jiaie faite, naimie abido danomo uaillena. Ie muidona naimie uaina jaca cacarefiñeitimaci.

### *Diáconuai illa rafue*

<sup>8</sup> Diáconuai creyentiaie llofueraini isoi marena illa. Inouiganona illa. Jifairaiñena. Ucubena nicidoñena.

<sup>9</sup> Naimacidi Cristona cai inua rafuena jeanide comeciainona inua.

<sup>10</sup> Bu omoi fetocania, naimacina nano facaci. Roracomo jiaie rana nano majita. Iena raise finoia, diáconuaina jaite.

11 Diáconuai ainiaí jiaí ñnogañaiñuaina illa. Jiaie comini joreñona ñaiñena. Jirorainina. Naga rafuena marena raise finua.

12 Nana diáconuai aidi dañaiñorie. Diáconuai uruiaí naimaci uaina raise ñnua. Diáconuai imaci anamo itinona raise sedajana uiñua.

13 Diáconuai marena maijia, comini naimacimo iobillacinona fecaitimaci. Cristo Jesúsna ñnuano, naimiena marefodo jiaí lloitimaci.

### *Jusiñamuina ñnotino*

14 Timoteo, raire o dine jaiacaducue; iadedi uicodo bie rafuena omo cueticue.

15 Are cue riñenia, dani omoi creyentiaí diese ofia, Jusiñamui ie cominina marena omoi illana omoi uiñollena, omo cueticue. Cajede Jusiñamuina jai sedadicaí. Uanaicinona riidoticaí.

16 Jusiñamui caina Cristona jai uiñotagafuedi jiaie rafue baifemo faite. Iena cai uiñuanona, raiticaí: Eniruemo Cristodi ñimana jai bairede.

Jusiñamui Joreñodi caina naimie uai siñonana uiñotade.

Jusiñamui jaienisaí naimiena jiaí ciodimaci.

Jiaie nairaiaimo naimiena lloticaí.

Iena cacajamona, ailluena cominidi diga nairaiaimo naimiena birui ñnotimaci.

Monamo naimie abido jai jaide.

## 4

### *Jiaínodi jiaíforie rafuena lloitimaci*

1 Jusiñamui Joreño caimo raise llote: “Jesucristo nia abido biñena facaiseconi damierie creyentiaí Cristona fañonocaitimaci. Taife díbeimo ite lloraini llwana cacarefillamona, Janabamona ite

lluacinodo jaitimaci. Taifemona ite lluacinodo jaitimaci”.

<sup>2</sup> Naie llorainidi: “Uanaicinona lloticaï raitimaci; iadedi taino llocabiitimaci. Naimaci comechiai jai tainomo iite.

<sup>3</sup> Ìima riño ie aina ollena rairuitimaci. Riño ìima ie ìina ollena rairuitimaci. Dajerie guille rana fimaidoitimaci. Jusiñamui iena fimaidoñede; ia creyentiaï uanaicinona uinuanona, iobillanona guillena, naimiedi naga rana finode.

<sup>4</sup> Nana Jusiñamui comuitaga guille radi mare. Iobillano iena cai feiñuanona, guiticaï.

<sup>5</sup> Jusiñamui llua jira, Jusiñamuimo cai jiiia, nana guille radi jai mare. Iemona maraiñede rafue jaca caimo comuiñeite.

### *Jesucristo rafuedo raise ñnocana jai*

<sup>6</sup> Timoteo, cue lluaña creyentiaïmo o lloia, Jesucristo ðibeimo raise maijidio. Cristo uaina ñnocana o jailla jira, mare llogacinodo o jailla jira, raise maijidio.

<sup>7</sup> Jamai rafuemo, jamai ñgaaïmo o comechina fa-caño; iadedi Jusiñamui jitailla rafuena finocana o jai.

<sup>8</sup> Mairillena o abi llarocaiadedi, mare; iadedi Jusiñamui rafuena o facajia, eo mare. Abi llarocaja baifemo Jusiñamui uaidi eo faite. Jusiñamui rafuedi o comechina birui ocuiñotaite. Jusiñamui ðine jiairuido o jaillena, o comechina marena jiaï raise finotaite.

<sup>9</sup> Bie lluacinodi uanaicino. Ie jira iena cai ñnua.

<sup>10</sup> Cai jillobillena, cajede Jusiñamuimo ocuridicaï. Ie jira duere sefuillano maijidicaï.



Jeacinomona Jusiñamuidi nana cominina jillobitaacade. Naimiena inotinona jai jillotate.

<sup>11</sup> Nana creyentiammo cue llwana raise llofue.

<sup>12</sup> Naimacina o llofueia, coniruenta nia o illamona: “O afemo iticai” naimaci raiadedi, damamai iese raitimaci. Mare illacimodo o jai. Ie mei iese raiñeitimaci. Marena o ñaiamona, marena o illamona, jiaie cominina o isiruillamona, Jusiñamuina o inuamona, o jeanide rafuena o finoñenamona, naimacidi fueoitimaci.

<sup>13</sup> O dine nia cue riñenia, creyentiai ofia, Jusiñamuina ciegafuina adofaca. Iena llono. Iena llofue.

<sup>14</sup> Creyentiaina llofueraini navui ofidemo, Jusiñamuimona o baitajacinona o feiñollena, naimaci onolliai o ifogimo jonetimaci onolliai o ifogimo jonetimaci. Naie facaiseconi Jusiñamui naimacina naicinona ona llotatate. Naicinona birui fainonocaiñeno.

<sup>15</sup> Iena eo uiuicai, nana comini Cristona inocana o jaillana uiñollena.

<sup>16</sup> O comecina raise eeno. Marena raise llofue. Cristo uaina inocana o jai. Iese o jai, jeacino finuamona jilloitio. Iese ona cacadino jiai jilloitimaci.

## 5

### *Timoteo afemo itinodiga ie illa rafue*

<sup>1-2</sup> Eimiaiina illamona, o afemo itinona riire llofueño; iadedi o moomo o llua isoi, naimacina fecuise llofue. O anafemo itinona o amatiammo o llua isoi, llofue. O afemo itiañuaina o eimo o llua isoi, llofue. O anafemo itiañuaina o miriñotiammo

o llua isoi, llofue. Naiñaiñuaimo jeare comecina facañeno.

<sup>3</sup> Naiñaiñuaina canollena, feciñuai comini iñenia, naiñaiñuaina cano.

<sup>4</sup> Feciñomo urui ai ia, naimaci naiñaiñona canua, naiñaiño naimacimo duilla jira. Einamacina illa-mona, iemona naiñaiñodi ibana oite. Iese itena, Jusiñamuimona mare.

<sup>5</sup> Feciñomo urui ai iñenia, da Jusiñamuimo naiñaiño ocuride, naimie naiñaiñona canollena. Jusiñamuimo nagarui jicabite. Bie isoide feciñuaina cano;

<sup>6</sup> Iadedi Jusiñamuimo duiñede rana ebiruiga feciñona canoñeno. Jusiñamui anamo naiñaiño jai raise iñenamona, Jusiñamuimona naiñaiñodi jai fiodaitiñaiño isoide. Fiodaite cominina jaca canoñedicai.

<sup>7</sup> Ie jira creyentiaimo buena llono, feciñuaina jeare buñai raillanona.

<sup>8</sup> Ie cominina canoñedimie Cristo uaina jai faionocaide. Naimiedi Cristona inoñedimie baifemo eo jearedimie.

<sup>9</sup> Creyentiaina sedarainina canolle feciñuai mameciaina o joneia, iese jone: Jai jionaidiñaiñuai diese mameci jone. Dajede inirediñaiñuai mamecina jone.

<sup>10</sup> Mare rafue naiñaiñuai finocabilla jira, jiaie cominidi naiñaiñuaidi mareñaiñuai raillañaiñuai. Ie urui ai raise sedadiñaiñuai. Cominina nafuecabitñaiñuai. Jiai creyentiaina abina iedoño canocabidiñaiñuai. Duidinona canocabidiñaiñuai. Diese mare rafuena finocabidiñaiñuai mameci jone.

<sup>11</sup> Feciñuai diese mameci o joneia, nia jion-

aiñede feciñuai mameciaina joneñeno. Naiñaiñuai nano llotimaci: “Inina dane oñeiticai. Da Cristona sedaiticai” llotimaci. Ie mei uri iñenanomona, iimana niciduamona, inina jitaitimaci. Ie jira naiñaiñuai mameci joneñeno.

<sup>12</sup> Naiñaiñuai navui llucinona jai fañonocaila jira, jiaie comini naiñaiñuai joreñuaina ñaitimaci.

<sup>13</sup> Naiñaiñuai diga jofomo macariruillamona, rairaiedimaci. Eo ñaillaredimaci. Naiñaiñuai ñaiñenacinuaido ñaitimaci.

<sup>14</sup> Nia jionaiñede itiñaiñuai iese iñellena, naiñaiñuai inina dane uana jitaidicue. Ie mei uruaiarenitimaci. Naiñaiñuai jofona sedaitimaci. Ie mei budi naiñaiñuaina jeare ñaiñeite.

<sup>15</sup> Cristona dajerie fañonocaida, Taife dibeimo jai jaidimaci.

<sup>16</sup> Creyente cominimona feciño iade, da naimie naiñaiñona canua. Jiaie creyentiaimo naiñaiñona canolle rana jicañena. Ie muidona comininide feciñuaina canorenitimaci.

<sup>17</sup> Creyentiaina llofueraini marena maijia, raise ibauiga. Naimaci lloia, naimaci jiaie llofueia, eo raise ibauiga.

<sup>18</sup> Moisés micori jaie ciegafuia iena llote: “Trigo oni juillena jurareta saisia, ie fuena maiñeno, ie guillena”. Guillamona ibana jai ote. Cristo jaie llote: “Maijidimiedi ibauiga”.

<sup>19</sup> Creyentiaie llofueraimana damie llogidoia, iena cacarefiñeno. Mena comini, nibai daje amani comini iese naimiena llogidoia, iemo cacarei.

<sup>20</sup> Creyentiaie llofueraimimona bu jeacinona finocabia, nana creyentiaie uicomo naimiemo riire llono, jiaie creyentiaie daje isoi iñellena.

<sup>21</sup> Dacinodo naga jeacino finoraimamo llono. Nagamiemo riidoñoeno llono. Fecuisse damiemo lloñoeno, naimiedi o nabaina jira. Jusiñamui caina ciode. Jesucristo caina ciode. Jusiñamui fetoca jaienisai caina jiai ciodimaci. Ie jira dacinodo llono.

<sup>22</sup> Jeacino naimiemo ia, naimie jeacino facaisena o iñellena, creyentiai llofueraimana jaillena, buna raire fetoñoeno. Jeacinomona oni eneno o i.

<sup>23</sup> Eo o duia, da jinuina jiroñoeno. O duicabilla jira, janore vino jiro, o jebe manollena.

<sup>24</sup> Jeacino dajerie finoia, iena uiñoiticaí, juez isoi Jusiñamui iena nia lloñoenia. Jeacino jiaíno finoia, iena uiñoñedicaí; iadedi jiaíruido Jusiñamui lloia, iena uiñoiticaí.

<sup>25</sup> Ie isoide. Mare rafue bu finoia, iena uiñoiticaí; iadedi birui iena caí uiñoñoenia, jicarena finoñoena jira, jiaíruido iena uiñoiticaí.

## 6

<sup>1</sup> Jusiñamuina ñnote maijirainidi naimaci patrones eo ñnua. Ie mei Jusiñamuina ñnoñedino Jusiñamuina jeare ñaiñeitimaci. Cai llofuiacinona jamaiñeitimaci.

<sup>2</sup> Jesucristona naimaci patrones ñnoia, maijiraini naimaci uaina jiai ñnua. Naimaci comeciai facañena: “Patrón creyentena illa jira, daní conima caí isiruilla jira, raise maijiñeiticaí”; ia: “Raise maijiñiticaí” comeciaina facaja.

### *Uanañedicinona llucino*

<sup>3-4</sup> Cai llogacinodi uanaicino. Cai Nama Jesucristona lloticaí. Bie llogacinomona naimie jitaille

isoi cai illanona, raise uiñotícaí. Jiaicinodo bu llofueia, abi ñedote. Abi uiñoñede. Uai eo uaitaiacade. Ie meinocni comini abina uradoidimaci. Daajena comeciaina lloñedimaci. Jiaie comini joreñañañaitimaci. Cai fiiena bitimaci.

<sup>5</sup> Uai uaitatimaci, naimaci comeciái maraiñeno illa jira. Uanaicinona jai uiñoñedimaci. “Cristo uai lluamona, ailluena ucubena oitícaí” raillanomo comeciaina facadimaci. “Iemona caimare iitícaí” raillanomo comeciaina facadimaci.

<sup>6</sup> Ie iadedi iese iñede. Cristona eo raise cai ñnuamona, caimo ñese ite ra ñiga caimare itícaí.

<sup>7</sup> Cai jeicíia, jaca buenidícaí. Cai fiodailla mei, cai rana uiñeitícaí. Cai radi benomo fiebicaite.

<sup>8</sup> Ie jirari, cai guille ia, cai ñiroi ia, caimare bene cai illa.

<sup>9</sup> Eo ucuberedinona jaiacadinona Taife eo ramo faite. Taife uaina ñnuanona ucube ollena, ucuberedinona jaiacadinodí ñiga maraiñede rafuena finodimaci. Ja muidomo imaci abi faifitimaci.

<sup>10</sup> Ucubena ebiruillanona, ucuberedinona jaiacadino naga jeacinona finocabidimaci. Ucube ollena, dajerie Cristona jai fañonocaidimaci. Ie muidona eo duere sefuidimaci.

### *Jusiñamui uaina ñnocana jai*

<sup>11</sup> Ero, Timoteo, odi Jusiñamui fetocamiedio. Nana cue como lloga rafuemonona oni eneno o i. Mare rafuedo o jai. Jusiñamui jitailla rafuena finocana o jai. Jesucristona ñnocana o jai. Jiaie cominina isirui. Mare rafue ñibeimo o comeciaina jone. Ricinodo cominina llofueñeno.

<sup>12</sup> Jeacino ñibeimo o iñellena, Jesucristona ñnuanona, llocana o jai. Jaca itatajacinona marena raise ñno. Jusiñamui ona fetode, o jaca

illena. Navui diga cominimo Jesucristona o inuana marefodo llotio.

<sup>13</sup> Ie isoide Jesucristo. Poncio Pilato dine jaie naimie itemo, marefodo: “Imiedicue” llotie. Jusiñamuidi nana rana cajetade. Naimie caina jaca ciode. Jesucristo caina jiai jaca ciode. Ie jira uanaicinona omo lloticue.

<sup>14</sup> Cai Nama Jesucristo nia abido biñenia, nana omo cue llogacinuai ino. Jearede rafuena finoño, jiaie comini naie llogacinuaina uaitañellena.

<sup>15</sup> Naimie jitaillirui Jusiñamuidi eniruemo Jesucristona dane oretaite. Jusiñamuidi maremie. Nanocamie. Cai nanoca cai moto illaima. Cai nanoca Nama.

<sup>16</sup> Da jaca naimie fioidañeite. Eo isire lligaiñote ra dinomo naimie ite. Nainomo jaca bu iairei rinide. Bu naimiena jaca cionide. Naimiedi jaca siñonasa. Naimiemo iobillacinona jaca cai fecacabillasa. Iena jitaidicue.

<sup>17</sup> Eo ucuberedinomo llono: “Abina iedoño. Ucubedi fuirede. Ie jira ucubena uamo ocuiriño; iadedi Jusiñamuimo ocuiri”. Cai comeciai jaisillena, naimiedi caimo rana eo raise fecacabide.

<sup>18</sup> Ucuberedinomo jiai llono: “Omo ucube diga mare rafuena fino. Jiaie cominimo ucubena caidiño fecajana cano”.

<sup>19</sup> Ie muidona iese naimaci finoia, monamo naimaci isiruiga rana iite, jiairuido iena. Iese naimaci jaia, jaca itatajacinona marena raise ua uiñoitimaci.

*Fuiduacino*

<sup>20</sup> Timoteo, cue omo llogacinona faiñeno raise uuiicai. Jamai rafuemo cacarefiñeno. “Ua-naicinona eo uiñotica!” dajerie raitimaci; iadedi uiñoñedimaci. Naimaci ñaiana cacarefiñeno.

<sup>21</sup> Dajerie iena cacajano, Cristona nia uiñoñedimaci. Jusiñamui ona duenailasa. Jaca ñinori omo rafuena lloticue. Mai. Pablodicue.

**Jusiñamui uai: Jusiñamui jito rafue illa  
rabenico**  
**New Testament in Huitoto, Murui (PE:huu:Huitoto,  
Murui)**

copyright © 2008 Wycliffe Bible Translators, Inc.

Language: Huitoto, Murui

Translation by: Wycliffe Bible Translators, Inc.

Huitoto, Murui [huu], Peru

**Copyright Information**

© 2008, Bible League International. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Huitoto, Murui

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.



Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

---

PDF generated using Haiola and XeLaTeX on 18 Apr 2025 from source files dated 29 Jan 2022

145a1f66-dca1-5de3-9c00-4e533605e488